

留青日札

留青日札卷之二十九

錢塘田藝衡子執樵

倩徐懋升玄舉校

四神四靈四祥

天有蒼龍白虎朱雀玄武四星之精降而在地則爲
龍虎鳥龜四獸之象兵家謂之四神麟鳳龜龍禮謂
之四靈麒麟獅子福祿玄武我朝謂之四祥王充
之論四靈有曰燕飛輕于鳳皇兔走疾于麒麟繩躍
躁于靈龜蛇騰便于神龍則是一無所靈矣惟甲可
卜有國所寶不疑卜廢又何靈哉宣德癸丑翰林院

篇修許杉達四祥詩此所謂一蟹不如一蟹也

五靈

龍鳳麒麟白虎神龜左氏之所謂五靈也配以五方則龍東方木也木焚則生火王者聰聰正知而水官修則龍出大川鳳南方火也火炮則生土王者貌恭體仁而木官修則鳳鳴高梧麟中央土也土甘則生金王者視明禮備而火官修則麟游茂苑白虎西方金也金溲則生水王者思慮信立而土官修則虎馴名山龜北方水也水液則生木王者言從文成而金官修則龜浮靈沼蓋孔子則尅母寶母則致子感應

循環生養不窮氣化自然之妙也

五靈之長

羽蟲三百六十而鳳爲之長毛蟲三百六十而麟爲之長甲蟲三百六十而龜爲之長鱗蟲三百六十而龍爲之長倮蟲三百六十而聖人爲之長萬物之中人爲最靈而聖人又爲萬物之靈是當爲五靈之長矣因是推之動物皆然夫植物則亦有然者穀植三百六十而禾爲之長木植三百六十而松爲之長草植三百六十而著爲之長蔬植三百六十而葵爲之長然聖人皆爲之樽節愛養以遂其生以若其世故

能爲天地昆蟲草木之主則是當爲百靈之長矣

麟

麒麟雄曰麒雌曰麟字皆从鹿故說文于麒曰仁獸麋身牛尾一角从鹿其聲是也至于馬之曰騏者亦从馬其聲而曰文如博基則襲矣夫基本从木其聲又何文之有不知於騏於基之取義皆有文如博基否也麟說文大牝鹿陸璣曰麋身牛尾黃色圓蹄角角端有肉音中鍾呂行中規矩王者至仁則出正義云有角示有武肉示不用郭璞曰角在鼻上京房曰五采腹黃高丈二尺金獸之瑞今并州有麟如

鹿非瑞應麟也牡鳴曰逝聖牝鳴曰歸和一作游聖
歸昌春鳴曰扶助夏鳴曰養殺春秋運斗樞曰機星
得所則生鸛冠子曰玄枵人獸陽之精也感精符曰
一角明海內共一王也我 朝永樂甲午榜葛刺國
乙未麻林國皆貢麒麟成化七年常德沅江縣產麒
麟甲辰泗州牛武陵田家牛皆生麒麟俱殺之弘治
辛亥蒲圻鄧榮家牛亦生麒麟不食而死嘉靖六年
四月舞陽縣生麒麟雙角馬蹄口吐火焰其聲如雷
野人恠而擊死其字又作麋麋麟見春秋傳

獅子

漢書烏弋山離國出獅子孟康曰獅子似虎正黃有
頰形尾端甚毛大如斗爾雅狻猊如戲貓食虎豹日
走五百里此常有不足異成化戊戌西夷貢獅子家
大夫在京師虫蟻房曾見之至嘉靖四十二年又貢
內兄張子文時爲陝西布政使親見之云大抵黃色
如金毛狗而尾長有威夷人以鐵索二條鎖之載以
鐵籠命之當堂放閱則先將大鐵椿長可六七尺釘
沒地中方可帶索放縱任其盤旋不使見犬馬之類
恐觸其怒也夷人與之狎習戲舞偶一犬失逐過前
卽狎獐大吼一聲草木屋瓦皆震此犬倉皇驚仆不

知逃避之所夷人亦大忙追遂喪之官日供一羊或
牛馬之肉數十斤須百夫扛荷且伴送夷人五六十
名甚爲居民之害夷人言初得小雛二頭養之而斃
其一此其雄也又家大夫言京中見飼獅子者不與
活生口恐觸其怒雖犬羊亦與死者虎遇毛物必用
舌舐去毛而後食惟獅子則舒前足擎物吹氣一口
則毛自飛落雖秋風之捲敗葉不如是之迅速此其
異耳故虎豹亦畏之又陝西老人言五十年前曾貢
一次與此正相類則知是成化戊戌嘉峪關所進是
也西域又有黑獅子捧獅子其糞名蘇合香其筋爲

絃鼓之則衆絃皆絕其尾爲拂子則夏月蠅蚋不敢集其上又犬生二子曰獅又虢一名師子

福祿

福祿番人本名福狸狀如驢露花紋黑白交錯瑩淨可愛異他獸出忽魯謨斯等國王繪圖所不載者又桃拔一名符拔似鹿長尾一角者曰天鹿兩角者曰辟邪漢之天祿閣因獸得名也

玄虎

玄虎本名曰騰式六切爾雅黑尻也猶似豹無前足或曰似虎而黑無前兩足又騰空黑虎

白虎

白虎卽騶虞也書汪義獸白虎黑文五采其尾三倍
鳴聲如雷嘯則風生瑞應圖曰仁而不害湯時戲于
朝見春秋演義圖郭璞曰怪獸河圖括地象曰王虎
晉太康六年荊州送兩足虎索靖議稱半虎時稱爲
白虎非也今之背斑白而虎文者亦彪也

復通犀

洪書通犀如淳曰通犀中央色白通兩頭今名通天
犀也又有復通犀者尤爲至寶通天犀地黑而花白
復通則通天白花中復有黑花故名此希世之珍也

草木子曰犀之通天者必惡影常飲濁水角之理形似百物犀角通者是其病角有鵠處必有犀三毛同孔抱朴子云以爲笄導攬毒藥則生白沫無復毒勢又敬宗南昌國進夜明犀狀類通天光照百里南州謂之玄犀異物志曰含精吐烈望若華燭是也倒插犀者一半已下通正插犀者一半已上通腰鼓犀者中斷不通駭雞犀者雞見其光影則驚鳴出義渠國或曰以米試之則雞駭角一尺以上刻魚形入水開方三尺故名分水犀大中時女蠻貢雙龍犀楊收女有卧魚犀唐有辟寒犀辟塵犀文宗辟暑犀同昌公

主蠲忿犀波斯名黑暗有二角長在鼻短在額

馬

天子十二閑六種邦國六閑四種家四閑二種十二閑凡三千四百五十六匹左傳注每廐爲一閑二百一十六匹馬四足曰匹左傳襄二年賂夙沙衛以索馬牛皆百匹或作疋小爾雅二丈爲兩倍兩爲疋四丈也馬光景一疋長故曰疋家語吳門白馬疋練是也又匹偶也易馬匹亡馬武獸也籀作𠂔古作𠂔隸作馬象馬頭髦尾四足之形麗馬一圉八鬣見周禮一歲爲騊二歲爲駒又五尺以上陰白

雜毛亦曰駒 三歲四歲爲騊兩齒 八歲爲馱
二十歲齒盡平 六尺以上爲馬一曰騊馬 七尺
以上爲騊父爲蚪一曰田馬 八尺以上爲龍瑞應
圖曰龍馬仁馬河水之精高八尺五寸一曰戎馬八
尺 牡曰騊牝曰騊駼草馬也 馱父馬 馬母見
漢書

古良馬名

飛黃 翠黃龍翼馬身皆黃帝馬 赤文堯馬五色
古黃 騰黃 中黃 衆黃 渠黃 古皇一名吉
皇 吉光 吉驪 九代夏后啓舞馬 文馬紂

雞斯一作奚斯

驛奚

翠麟

麟趾

腰褭一作

褭驪

飛菟

玄蚪

驊騮一作華駟赤馬黑毛

乘風

遺風呂氏春秋

先景

齧膝

乘旦

吉良大封國文馬

赤驥

驥驎孫陽所相青驪色

又蒼艾色

秀騏

游騏子虛賦

舊馬東北俞人

馬一角無角騏

蘭池

常驪

逢驪皆見尸子

龍媒

驥子

白虎羽獵賦

驚鴻

屈乘

玉澤

師曠時來

駮龍

紫鹿

文的

躡魚陳琳武庫

風

絕地

翻羽

奔霄

越影

踰輝

超光

騰霧

挾翼周穆王八駿

白犧

踰輪

山子

盜驪 騄駼 驊騮渠黃赤驥皆八駿之別名陸鴻

漸曰山谷之人獻神馬八匹 驕驍一作驥左傳唐

成公兩馬 綠蛇 翠駃 逐日一日能行萬里

追風 白兔 躡景 奔電一作追電 飛翺

銅雀 晨鳧一作長鳧秦始皇七馬 飛燕含陽侯

飛兔見禰衡傳 白鵠漢 烏騄楚霸王騄蒼白雜

色師古曰因其色名之也本作蒼黑雜毛馬

浮雲 赤電 絕群 逸驪 紫燕 綠螭 龍子

麟駒 絕塵皆漢文帝千里馬 蒲梢 龍文 魚

目 汗血即天馬子史記大宛馬 西極馬出烏孫

初亦名天馬皆漢武帝

果下騶漢廐中馬卽今果

下馬出朝鮮高三尺

雙脊馬隴水出

乾河馬

小步馬漢烏秣國一名百步千蹄

元馬甚巨日行

千里

駃騠卽決蹄馬父羸子剝母腹而生生七日

而超其母史記注北狄駿馬與騊駼同

騊駼青色

出陶金國師古曰海中獸壯如馬卽騊駼

巨虛騊

騊野馬

騊蹄跡秦馬又曰騊駼

騊馬施水出見

山海經

的盧白額易曰的顙本作駒今之戴星馬

漢昭烈晉庾亮同惟準有旋毛及白毛名的吻凶

赤兔關羽得呂布馬

絕景曹操見魏書

驚帆曹

真 紫馬謝康樂 驪驄父馬陳安 鷲騄晉書

朱龍趙冉閔 赭白晉高麗國獻又燕慕容廆馬名

赭白有奇相四十九歲駿逸不虧又宋文帝馬名

茲曰文選注義渠獻茲白若馬鋸齒食虎豹 駁易

乾爲駁馬色不純也詩皇駁其馬赤白色齊桓公晉

平公馬後周齊王憲獨取駁馬曰色類旣殊駁獸名

如馬白身黑尾食虎豹君乘火王南海輸駁馬又充

州六駁食猛獸 鐵驪月令赤黑色 鐵驄青色

鐵驪古良馬又曹丕與孫權書 紫驄曹植馬

奔虹赤 什伐赤 拳毛騶 峴露紫 時勤驄

黃驃

青驃

白蹄皆唐太宗

紅三

紫玉

照夜白

百花輦

飛香

平山

凌雲

碧雲駉

皆玄宗大宛汗血

如意驃

神智驃德宗功臣

皎雪驃

凝露驃

懸光驃

決波驃

飛霞驃

騰霜白

發電赤

流星驃

翔麟紫

皆唐時骨

利幹猷

飛鳳

蹀馬善舞

流金驃回紇名馬

越睽駿見唐書

花驃于闐國出唐有玉花驃

五花馬唐人尚翦駿馬三駿者曰三花五駿者曰五

花

忽雷駉秦叔寶

赤驃陽城王衛伯玉有歌

獅子驃郭子儀花馬

青海驃吐谷渾出小馬久有

青海周八九百里中有山須冰合游牝馬其上明年
生駒號龍種嘗得波斯馬牧于海生驄駒日步千里
故世稱青河驄見唐書 紫叱揆酒徒鮑生換妾

桃花叱揆唐名馬黃白雜色曰駟即桃花馬 一丈

烏梁太祖賜冠彥卿 赤舞龍駒 白舞龍駒梁吐

谷渾獻能拜伏起舞唐玄宗時使壯士擎木榻而馬

舞其上 連錢驄即青驪驎亦曰驊 烏驄 青龍

冒頓馬 駟驂番中大馬 白鼻騮 白額駒李嵩

麝香駒 錦耳驄 駱十二 趨日驄 偏界玉

蹈水駒 長命駒 孫兒驄 龍鬆白 八百哥

掠地雲 錦地龍 雪面娘 月影三 玉尾駙
撒沙騮 天花落 旋風白 宰地驕 六尺金皆
蜀王衍苑馬 綠耳柳李從謙 吉祥座杜重威
肉胡麻景延廣 金鞍使者 千里將軍 致遠侯
渥洼郎 驥國公王景五馬 玉逍遙宋仁宗馬
自在將軍劉吾馬 五白 玉面皆北虜良馬
紅耳叱撥 兜央叱撥 桃花叱撥 丁香叱撥
青叱撥 騮叱撥 榆叱撥 紫騮叱撥凡八種見
宋王明群牧故事

大明名馬

青驄 赤驃

飛越峯一名撞倒山皆

太祖神駿

洪武四年六月壬寅僞夏明昇降獻良馬十其一白者云得之貴州養龍坑身長十有一尺頭高九尺足高七尺有肉隱起項下約厚五分廣三寸餘貫膺絡腹至尾間而止精彩明晃振鬣一鳴萬馬辟易韉勒不可近近輒作人立而吼 上親撰祝策 詔祀馬祖乃勅典牧副使高敬囊沙四百斤壓之人跨囊上游行苑中性漸柔馴八月癸巳 上行夕月禮于清涼山壇上乘之而出如躡雲而馳一塵弗驚 上大悅賜名爲飛越峯用命御用監直長馬晉臣繪形藏

馬詳見宋學士贊 一名撞倒山者國初破陳友諒
獲其戰艦有名曰混江龍曰撞倒山者與馬同也
六蹄馬見張靖之集 龍馬 成祖永樂庚子十二
月青州諸城縣民崔友諒家有牝馬浴于青水潭雲
霧興騰若有物與交及生駒色青蒼而麟臆肉髮龍
文徧體形狀非常有司進于上文武表賀名龍馬

龍駒

赤兔

烏兔

飛兔

飛黃

銀褐

棗騮

黃馬

成祖八駿名

龍駒戰于鄭村壩中箭都指

揮丑丑拔

赤兔戰白溝河中箭都指揮亞失鐵木

兒拔

烏兔戰東昌中箭都督童信拔 飛兔戰夾

河中箭都指揮猶兒拔 飛黃戰葉城中箭都督麻
子帖木兒拔 銀褐戰宿州中箭都督亦賴冷蠻拔
棗騮戰于小河中箭安順侯脫火赤拔 黃馬戰靈
壁中箭指揮雞兒拔 學士劉定之詠之夫靖難八
駿皆 成祖所乘而皆臨陣中箭又皆大貴人爲之
拔焉亦已奇矣况駿皆傷而 成祖聖躬無虞以重
光大明之業不亦尤大奇駿也哉因繪之爲八駿圖
視周穆王之八駿唐太宗之八駿超越當萬里矣
龍馬宣德九年甘肅獻

玉麟驪

白玉駒

碧玉驕

照夜璧

銀河練

瑤池駿

飛雲白皆

六閑選乘也嘉靖十二年四

月十三日

上演馬南城召大學士張孚敬李時方

獻夫翟鑿同遊環碧殿嘉樂館錫宴重華殿賜孚敬
蟒服時等飛魚服 上賦律詩二首紀之群臣應制
奉和張公詩云傳宣萬乘御重華待賜同游卽賜茶
環碧殿前先看馬蒼龍門外更觀花君臣自古原同
體海宇于今總一家錫宴從容還賜服聖恩莫報實
無涯李公詩云聖王御極萬方安試馬宸遊愜衆惟
內苑草茵迎玉輦行宮花氣襲雕鞍薰風拂拂當朱
夏翠靄葱葱映紫鑾千載明良真不偶流傳青史後

人看方公詩云御林初夏晴明日天子乘龍喜色多
共訝飛雲擊白玉渾看匹練下銀河同游環碧臣何
幸賜對重華語更和應制慚無天馬賦南薰惟誦舜
廷歌翟公詩云宸游內苑御飛龍盡是神駒渥產雄
巧翦緋羅纏寶鑑分題玉篆佩花駉三千駿內名稱
貴十二閑中品料崇從此受恩何以報願將赭汗從
長風又云選得龍媒新賜名習從環碧殿頭行草茵
似錦蹄過軟官路如絃踏去平立向天墀應自慶穿
將仙仗絕無驚微臣得侍瑤池上願播聲詩頌聖明

地中馬

古者龍馬負圖出于河歐陽公尚疑之乃有種蒔馬出于俱位國云以馬種蒔而生馬又襄陽記匡廬山一地穴漢時有數百匹馬出因名馬穴吳陸遜亦知此穴馬出得數十匹梁元帝答齊國雙馬書曰名重桂條形圖柳谷襄陽地穴近求未易滇池水裏遠訪猶難則馬穴信矣不亦爲天地間之怪馬哉孝經援神契曰德至山陵則澤出神馬地鏡圖曰銅器之精見爲馬

解語馬

解語馬大食國出能解人語淮南子曰馬聾虫也而

可以通志則馬固解人語也然人亦有解馬語者陽翁偉知寒馬眇馬之遙罵李南知赤馬白馬之呼子見論衡及抱朴子書

貊

貊說文北方國豸種本作貉孟子大貉小貉也或作貉史記胡貉月氏師古曰東北方三韓之屬又貊似熊而黃黑色出蜀白居易云象鼻犀目牛尾虎足寢其皮辟溫圖其形辟邪今俗謂之白澤杭有白澤大王廟猶所謂白馬廟也軒轅紀帝登桓山於海濱得白澤神獸能言達于萬物之情因問天下鬼神之事

今爲圖作祝邪之文以祝之或作模相如傳模聲
哀牢夷傳百獸似驃而小驃父牛母也△南中志云
貊大如驢狀頗似熊多力食鐵所觸無不拉廣志云
貊色蒼白其皮溫暖皆似未明余嘗因蠻貊之義而
推四夷之名莫非禽獸取義也并列于後

夷羌蠻狄

東方之人曰夷从大从弓舊稱俗仁而壽有君子不
死之國九夷者畎夷于夷方夷黃夷白夷赤夷玄夷
風夷陽夷九種也又東夷九類玄菟樂浪高驪蒲飾
鳧吏索豕東屠倭人天鄙也西方之人曰羌从人从

羊謂西戎牧羊人也後漢書羌有百五十四種散處
三河或作獠南方之人曰蠻从虫緣聲蛇種也禮夏
官疏蠻縻也以爲夷狄縻繫之以政教書三百里蠻
注蠻慢也風俗通君臣同川而浴極爲簡慢其類有
八天竺咳首僬僂跛踵穿鼻僭耳狗軼旁春世之所
謂八蠻也北方之人曰狄从犬亦有聲赤狄本犬種
狄之爲言淫辟也風俗通其行邪辟其俗叔嫂同穴
父子無別其類有五月支穢貂匈奴單于白屋也或
作翟史戎翟荒服匈奴傳夷翟又赤翟白翟翟山雉
也又西曰氐氐氐也與羌同亦曰戎从戈甲會意詩

疏兒也斬伐殺生不得其中其類有六饒夷戎共老
白耆羌鼻息天剛也余謂戎與玃類獸名禺屬也又
曰蜀者葵中蠶大如指今四川地也東南曰閩越種
从虫門聲周禮職方氏七閩注閩蠻之別國語韋蠻
也又叔熊避難于濮蠻隨其俗如蠻人其子孫分爲
七種故曰七閩今分八府故曰八閩周禮疏八蠻在
南方閩其別也曰荆蠻者晉志荆蠻也言其氣躁彊
亦曰警也言南蠻數爲寇逆常警備也又高辛氏桀
紂負帝女入山生子一十二人六男六女自相夫婦
其後滋蔓號曰蠻夷又戎曰獠豕之逸也漢書匈奴

傳隴以西有吠狄獬之戎史斬戎之獬王或作獬獬
貉子也貉似狐善睡獸西南夷曰獬又曰猓狢犬種
也曰都善皆从羊羌種也曰哀牢若牛羴之在牢可
哀也北狄曰胡胡从肉果聲牛領下垂皮也曰羯胡
者羴殺猪也曰獬獬曰獬狢曰匈奴皆犬之兇惡者
突厥之先小兒與牝狼交遂生十男突者犬從穴中
伺人不意突然暫出也曰高句驪曰驪曰狼牙修曰
師子皆獸類也曰回鶻北夷種卽回紇唐時請改回
鶻言其便捷如鶻之飛也曰燥蠕曰蠕蠕則又皆細
虫矣中國以禽獸畜夷狄一至此哉 二十九卷終

留青日札卷之三十

錢塘田藝蘅子枕樹

倩徐懋升玄舉校

龜

孔子曰龍食于清游于清龜食于清游于濁魚食于濁游于清丘上不爲龍下不爲魚中止其龜與因考周禮言龜四時所生者不同未聞有五色者嘉靖四十一年陝西散官王金表進五色龜云得之終南山此又異產也朝廷告廟錫之以官宋衛平曰龜者天下之寶壽蔽天地四時變色春蒼夏黃秋白冬黑王

能寶之諸侯盡服王勿遣以安社稷故元王卒受之
龜人掌六龜之屬各有名物天龜曰靈屬地龜曰澤
屬東龜曰果屬西龜曰雷屬南龜曰獵屬北龜曰若
屬張平子思玄賦東龜注青色也抱朴子龜千歲五
色異色如玉額上兩骨起如角解人言浮出蓮葉之
上或在叢蓍之下禮甲蟲三百六十神龜爲之長爾
雅一神龜二靈龜三攝龜四寶龜五文龜六筮龜七
山龜八澤龜九水龜十火龜神龜最神靈龜本草曰
秦龜亦曰觜螭其甲有文似瑇瑁而差薄耳故名鼈
皮能鳴多出涪陵其甲可以卜攝龜小龜一名鰲龜

一名來蛇龜好食蛇亦曰呬蛇龜腹甲曲折解能自
張閉一名陵龜又云蛇所化故曰螭龜寶龜傳圖者
所寶文龜甲有文彩者河圖曰靈龜負書丹甲青文
筮龜常在蒼叢下火龜生于火者猶火山生火鼠也
龜之中一行五方勝以應五行兩旁左右各四方勝
共八以應八節周外左右各一十二方勝共二十四
以應二十四氣通共三十七數以應乾之策三十六
而太極居中不動之一數底板下爲地左右各六凡
十二方勝以應十二州分野之應通背上三十七數
計四十九數即合太極虛一之數說苑曰千歲五色

背陰而陽上隆象天下平象地轉運應四時蛇頭龍
頸左睛象日右睛象月知存亡吉凶二說頗合記曰
能得名龜者財物歸之家必大富至千萬一曰北斗
龜二曰南辰龜三曰五星龜四曰八風龜五曰二十
八宿龜六曰日月龜七曰九州龜八曰玉龜凡八名
龜龜圖各有文在腹下不必滿尺二寸民人得長七
八寸可寶矣能得百莖著并其下龜以上者百言百
當或曰百歲一尾千歲十尾

龜書

洛龜負書歐陽公猶疑之抱朴子曰八卦生鷹隼之

所被六甲出靈龜之所召謂鷹隼之羽文亦有八卦之象也車頻泰書曰符堅建元十二年高陵縣民穿井得大龜三尺六寸背文召八卦古字堅如石在池養之則河圖洛書信矣

能言龜

說苑曰龜千歲能與人言此或解人言也如今之吳下婦女教龜算命者小龜皆能曉人言語令行即行令止即止不必千歲也又有烏龜疊塔之戲甚奇異至于洞冥記乃曰獻能言之龜則未之聞也

蘭葉龜

古言龜生三百歲大如錢游于蓮葉之上三千歲青
邊緣尺二寸而許景先之詩則云蘭葉負龜初薦祉
桐花集鳳更來儀是又能游于蘭葉之上矣

朋貝

六韜曰散宜生以千金求天下之珍恠得大貝百朋
以免文王詩曰錫我百朋注二貝爲朋貝者俗名臥
一作海虵周用紫貝是也書傳大貝如大車之渠今
雲南所用小貝以一爲莊四莊爲手四手爲苗五苗
爲索交易租賦皆用之易曰或錫之十朋之龜注大
寶也兩龜爲朋惠州志有巨龜在沙嶼間背生樹木

渡海者誤以爲洲依以炊食龜熟而沉死者數十人
此正所謂大寶也龜三足曰賁又三鳥爲朋

雄龜

說文曰天地之性廣肩者無雄龜鼈之類以蛇爲雄
此大不然余嘗問之老漁翁善禽鼈者云龜鼈之類
自各有雌雄其尾尖而長者雄短而肥者雌也因多
取而畜之徃徃交群自能生育可見物之不可不格

卜兆

世本曰巫咸作筮禮曰龜曰卜著曰筮元命苞曰古
司怪主卜三禮圖曰秋取龜春攻龜卜春灼後右夏

灼前左秋灼前右冬灼後左書五兆一日雨二曰霽
三曰蒙四曰繹五曰克古者卜人定龜史定墨君定
體占龜者五兆大橫土兆也直水兆也從右邪上金
兆也從左邪上火兆也曲水兆也以大小長短明暗
爲吉凶或占凶事又以短小爲吉又有旋者吉又卜
師掌開龜之四兆一方兆二功兆三義兆四弓兆經
兆一百二十體言四兆者分爲四部是龜卜四部著
筮三篇也白虎通曰乾草枯骨衆多獨以著龜何龜
之言久也著之言著也五行傳曰禽獸草木之壽久
則能知吉凶也私煩數困瀆或不精嚴神不告也或

觀卦察兆占不得也或龜不神著不靈此其所以過
差聖人不得專用也龜筮共違于人神靈不祐也

大橫兆 山陵兆 壽房兆

文帝卜兆得大橫占曰大橫庚庚余爲天王夏啓以
光漢書注大橫文正橫也張晏曰文帝襲父迹言似
啟也殊不知文帝之子景帝名曰啓此又其先兆也
非但天王之爲天子也又左傳有兆如山陵者又順
烈梁皇后名姁年十三選入掖庭太史卜兆得壽房
又筮得坤之比遂以爲貴人

大鳥卦

張衡思玄賦懼筮之長短兮鑽東龜以觀楨遇九臯
之介鳥兮然素意之不呈言卜而遇大鳥之卦素意
不逞繇辭也易中孚鳴鶴在陰亦九臯之謂也

不獻魚鼈

禮水潦降不獻魚鼈注云水涸魚鼈易得不足貴故
不獻非也蓋憫其易得故不忍獻之非賤其不足貴
也聖人豈恣口腹以貪黷得之味者哉此弋不射宿
之意也又周禮春獻鼈蜃文子曰鼈無耳而不可蔽
精于明也

赤鯁公

唐律取鯉即放之賣者杖六十號曰赤鯉公以其與國姓同音也佩用魚符亦取鯉象武后革命以龜代之先是隋煬帝時爲鳳船之歌云三月三日到江頭正見鯉魚波上游意欲持釣往撩取恐是蛟龍還復休此李氏典之識也故唐人重鯉猶先朝吳越訛言朝廷禁小民不許畜猪亦謂與國姓同音也一時信之猪無大小屠宰一空至于肉賤而不售愚民無知真可笑也鯪即鯉字

蛟鯉

草木子魚三千斤爲蛟按蛟龍三十六鱗鯉亦三十

六鯪數合故能飛能化龍云池中畜鯪至大風雨時
雷震便率羣魚飛去又蛟似蛇四足細頸白嬰似龍
無角池滿三千六百蛟來爲之長能率魚而飛置笥
水中即不復去夫三十六三千六百皆老陰六六之
數故能化也一名水豹文選蛟蛇也

灌水鯉

時有憲司一達官出令禁街坊灌水魚塞沙雞鵝等
細務余適在一縣官席上燕會偶市鮮鱗作羹巡卒
擒一魚牙行并二鯉魚灌水者至其人懼責乃涕泣
哀辨非灌水者縣官方怒必欲加刑法余醉中憐之

乃叱之曰汝休再言不是灌水之鯉阿衡之珍味湯
嗜之我亦嗜之耳縣官不解詢知其故遂笑而釋之
蓋世傳伊尹干湯言天子可具三羣之蟲而水居之
珍有洞庭之鮒灌水之鯉也灌水地名今四川灌江

鯪鮓

荀子鯪鮓者浮陽之魚也昧于沙而思水則無逮矣
即鯪也陽晝謂子賤曰夫扱綸錯餌迎而吸之者陽
橋也其爲魚薄而不美若存若亡若食若不食者鮓
也其爲魚也博而厚味子賤未至單父冠蓋迎之者
接道子賤曰車驅之所謂陽橋者故宓子廟碑云豈

意陽驕化而爲魴從木從馬古字通用魴白魚也

摩竭魚

海中大魚口可容舟故曰吞舟之魚其名曰摩竭

斗魚

皮曰休詩一斗霜鱗換濁醪注吳中賣魚論斗酒乃論斤今以斤稱酒尚然至于魚則間亦用斗惟淮上細鰕方用斗量論石豈即漢水居千石魚波之義邪然古人二十四銖曰兩六兩曰錢十六兩曰斤十五斤曰秤三十斤曰鈞一百二十斤曰石豈所云千石者亦斤之積與而斗魚甚奇草木子曰武陽小魚一

斤千頭今細蝦米名曰一筴千言一箸可千頭也

群物工藝

虎善卜

狸善博

鶴善符

鶴善舞

鷄善闘

鸞善歌

鸚鵡鸞鵒善言

鳩善步罡

鴛鴦善畫印

鴻鵠善効

螺贏善祝

蛇蟠同王

鵲巢背太歲

燕伏戊巳

虎奮衝破

乾鵠知來

猩猩知往

鸛影抱

鶴睛抱

鼈精抱

蝦蟆聲抱

熊宜經

鳥宜申

龜宜息

狼宜顧

鶴聲學仙

雉聲宜

習武

鳥聲宜習醫

鴈聲宜習卜筮

鵲聲宜習

工巧

梟聲宜習符呪此皆物性自然之巧也

群物相制

青要食虎 金翅鳥食龍 蜈蚣食龍 鼠食象
獅食象 角端食獅 玄龜食蟒 蟒蛇吞鹿
狼蝨齧鶴 蚍蜉困騰蛇 蜻蛉蜈蚣 飛鼠斷猿
豈在形之大小哉氣足以制之而已

群物忌食

獺飲酒而斃 猩猩飲酒而仆 虎食楊梅而醉
猫食薄荷而醉 鳩食桑椹而醉 雀食木鼈而醉
熊食鹽而死 魚食巴豆而浮 鷓鴣食豕肉而瘋
猫食黃魚而癩 狗食木鼈而死此皆物性之遠也

蝗

魚子能變蝗部吏侵漁百姓則生今三十年無之皆
爲螟蠹之害豈古之貪吏顯而今之貪吏隱邪

豹脚

豹脚今花蚊南方蚊母鳥吐蚊諺云錢清蚊子大如
鵝高郵蚊子大如鴨此也有露筋娘子廟是其證也
北方元故都聞有大如蜻蛉者見北征錄大戴禮曰
聖人有國蠱蚊不食天駒又晏子曰焦螟集于蚊睫
栖宿去來而弗覺神異經方蚊翼下有小飛虫生九
卵成九子飛而去蚊不知即蠛蠓子浮塵子之類

龍鴨

弘治間徐德輝鳳之任江西偶見河有鴨七頭毛色
異常從者擊之俱向曠野飛去所過之地盡成川澤
始知是龍所變也正德間餘姚燭溪湖童惠潘家夜
半風雨大作忽見房中窓間有物掩映其夫令婦推
窓視之手上如有物擦過者少頃風雨遂息迨曉牀
後地穿一穴廣六七尺深半之門外一望數里道路
橋梁悉皆崩圯方知其爲蜃也嘉靖二十一年杭州
八字橋胡獸醫家風雨晝作屋柱傍穴地出蜃破塚
瓦四五尺而起又三十二年龍過方山余祖塋松木

大可數十圍者悉連根拔起七八株三十七年六月
六日余避暑品品見一白龍挂于山南尾垂至地復
引一龍而上並遊雲中少馬村民走報起于青墩步
廬舍數十家其氣如火勃勃然蒸人甚可畏也去此
裁二里許四十五年六月三十日龍過西湖風雨大
作寶所塔鐵頂墮下湖船翻三四隻接待寺新建千
佛巨閣平地帶起火餘者三次跌爲齏粉無完植者
後有人自蘇州回云是日亦大風雨有龍過

馬黑牛黃羊哀狗寶鳳石虎石鮮答

馬黑一名馬墨在賢

牛黃在膽牛有黃者或吐弄之人得所吐黃剖之中
有物如蝶飛去惟以活取者爲難得治痰火癰癩凡
牛有黃者時常有聲以秋月夜盆水取之則活

芩衷在腸形如小鼠子可治噉食翻胃余見其三

狗寶凡狗有寶則羸瘦毛落不勝其熱入水自濡嘉
靖四十四年春吾鄉一小民家屠一狗腹中有白石
三塊如栗同胞破之可千葉入藥可治毒瘡

鳳石鳳皇所止處脚下掘深三尺有物如白石服之
安心神

虎石一名虎精虎自於光射之墜入地中成物如白

石入藥治小兒驚

鮮谷乃走獸腹中所產石子蒙古人用以禱雨一作
鮮單出西寧古輪臺之地又曰馬驢鼻患腫毒卽難
秣土人伺其將潰以囊承口腫落而得之如雞卵堅
如石軍中無水卽掘地置其中以氈覆之可得水一
二升猪亦有之

印魚

印魚本作鯽吳都賦鯽龜鰭鰭鯽魚長三尺許無鱗
身中正四方如印扶南國俗云諸大魚欲死鯽魚皆
先封之今吾鄉池中往往有魚身如火烙印者小民

無知以爲五聖所印名曰神魚凡魚有印則水畜必
敗卽所謂魚欲死也

魚虎

魚虎水狗也能食魚故一名天狗本名鵠又名翠碧

鴻豹

鴻豹卽鵠也善食鴻見易林又名獨豹

玄針

玄針鮒蚪也色黑而尾如針一名玄魚

射魚

春秋隱公矢魚于棠宋史丁璉蹠而射魚南都賦俯

黃魴鯉唐詩澄潭晴日射遊魚又云秉燭射遊魚李
商隱射魚曲云思牢弩箭磨青石續額蠻渠三虎力
是皆用竹弓弩鏃以射之也

魚聲

吳都賦魚鳥聳聳聒何曰魚當無聲此云云者文之
失也此正陸夫不解耳海中捕石首魚者以竹筒聽
之其聲如雷魚來候也上林賦魚驚謹聲可証

魚名切對

西施乳可對楊妃舌新婦臂可對老婆牙河豚脾名
西施乳江珧柱名楊妃舌吹沙魚爾雅名魴鮓海濱

人呼曰新婦臂以爲珍品蟾生于海崑又名老婆牙

養

養片謂之養魚周禮辨魚物爲鱣鮓止魚乾也通作
槁故今名乾魚爾雅翼南人以魚鮓而食之曰養宋
時武昌謂之淡魚今有鹹鹵未乾者直曰鹵魚

馬捉老鼠

方言馬捉老鼠蓋譏人粗撞不了事也傳曰騏驎驎
騏捕鼠于深宮之中曾不如跛猫淮南子曰釋大道
而任小數無以異于使蟹捕鼠蟾蜍捕蚤不足以禁
姦塞邪盧照鄰云命鸞鳳兮逐雀驅龍驤兮捕鼠馬

異詩將吾劍今切游泥使良驥今捕老鼠莊子曰驥驥驛驪一日而馳千里捕鼠不如狸狌言殊技也

狗

狗叩也見人而叩事也孔子曰叩氣吠以守是也狗苟也遇類而苟合也韓子曰繩營狗苟是也

大狗

葵大狗也漢書屬賓國出大狗郭義恭廣志曰狗大如驢赤色數里搖尾以呼之

小狗

今之矮爬狗即古小狗之種蓋與中國狗交而漸高

大者也馬鐙狗長四五寸可藏之馬鐙中者唐高祖時高昌獻狗高六寸長尺能曳馬銜燭云出拂菻國中國始有拂菻狗菻或作森元延祐間佛昇國使來言國當日沒之處有水銀海周圍四五十里健夫駿馬貼金薄馳還引水銀沸逐取之用香草同煎即成花銀矣杜環經行記拂菻在苦國西一名犁軒一統志其國東自大食及于闐回紇抵中國洪武四年朝貢土產不載今杭城此種甚多其最小者沈舉人汝文家得一對自徐閣老處紫毛可愛

沐猴

史沐猴而冠沐猴猴名出蜀賓國見漢書郭義恭廣志曰沐猴卽獼猴也又瓜哇國有猴王猴夫人山中猴不畏人呼以霄霄之聲卽出或投以果實則其大猴二先至食畢群猴乃食又百花國有紅猴

長卿

長卿蚡蜋也卽今蚡蜋之大者余戲贈之詩曰名旣侔猶彭越字復相如長卿黃中文章膏馥介然甲冑戈兵茂陵壚頭風味梁楚江上威聲侔余橙酒潦倒免爾草泥橫行又藥名徐長卿蕭子雲賦長卿晚翠簡子秋紅螭八跪而二敖荀子曰六跪而二敖非也

又苑國出百足蟹長九尺四螯煎爲膠名蟹膠

方正學蛇報之妄

所傳方希直之父葬祖夢蛇而殺之之事以爲母見黑氣入室而妊又云生而吐舌如蛇此真小人好事之誣也遂以赤族爲蛇報此又佛氏之妄談以惑衆者夫蛇天地間之毒虫殺之何害畜之何益假使真有黑氣入室安知非玄武之神所托生者乎又安知非燕王起于北方以北登極以成正學萬世之事業者乎生而吐舌又安知非能言語文章以明古今大道以陳君臣正義之用者乎身苟全矣名荷立矣使

其先人後裔之遊魂死而無媿于天上地下何樂如之而反憂于族之赤不赤哉夫不忠不孝而赤族是可耻也忠矣孝矣而族赤焉是可榮也于蛇何與嗚呼小人之說不止蛇珠雀環之可笑也宋庠登科此常事耳而以爲救蟻之報甚至于繪之爲圖以惑世愚民倡爲佛氏不敢殺生之論鄙哉鄙哉是可謂螻蟻狀元矣不亦小乎其爲學問福量也邪

蚌

蚌甲虫之肉最甘者也余得海濱一巨蚌可一尺五寸世所罕有留殼以充酒器名之曰蚌舟其小者名

瓦銍子言形如瓦壘也其種可種廣東有蚌田

四方淫物

東方之鰈比目魚也西方之鰐比肩獸也南方之鷦
比翼鳥也北方有比肩之民亦當曰淫民極樂國其
人二首而身晉楊方合歡詩譬彼比目魚又生爲
併身物暑程比翼扇寒坐併肩甌齊彼蛩蛩獸舉動
不相捐比目魚本名鮒古名淫魚魏文帝詩淫魚乘
波聽踴躍自浮沉博物志比翼鳥一青一赤一名共
命鳥釋書共命鳥二首一身杜詩蓮花交響共
留青日札卷之三十

命鳥是也